



# Reglugerð HSÍ um dómara og eftirlitsmenn

## I. Kafli Dómarar

### 1. gr. Flokkun dómara

Handknattleiksdómurum skal skipað í eftirfarandi þrjá flokka eftir kunnáttu og reynslu:

- a) A-stigs dómarar
- b) B-stigs dómarar
- c) C-stigs dómarar

Dómaranefnd HSÍ tekur ákvörðun um færslu dómara á milli flokka.

### 2. gr. A-stigs dómarar

Til þess að hljóta réttindi sem A-stigs dómari þarf dómaraefnið að verða 15 ára á árinu og hafa sótt sérstakt námskeið fyrir A-stigs dómara á vegum dómaranefndar HSÍ.. Námskeið fyrir A-stigs dómara skulu haldin að minnsta kosti tvívar sinnum á ári í samráði og samvinnu við félögin.

Dómaraefni skal standast skriflegt próf og sýna fram á verklega kunnáttu hjá sínu félagi.

A-stigs dómari hefur rétt til að dæma leiki frá og með 8. flokki til og með 5. flokki.

### 3. gr. B-stigs dómarar

B-stigs dómari getur hver sá orðið, sem starfað hefur sem A-stigs dómari síðastliðið ár og dæmt að minnsta kosti 15 leiki á vegum HSÍ og einnig lokið námskeiði fyrir B-stigs dómara á vegum dómaranefndar HSÍ. Námskeið fyrir B-stigs dómara skulu haldin að minnsta kosti einu sinni á ári.

Dómaraefni skal standast tvíþætt próf, skriflegt og verklegt.

B-stigs dómari hefur rétt til að dæma alla leiki nema: leiki í meistaraflokki og 2. flokki karla, úrslitaleiki yngri flokka og bikarkeppni yngri flokka.

Dómaranefnd HSÍ getur veitt undanþágu frá þessum ákvæðum, þegar sérstaklega stendur á og er nefndinni þannig heimilt að meta kunnáttu og reynslu A-stigs dómara og veita honum réttindi sem B-stigs dómara án þess að hann hafi lokið sérstöku námskeiði fyrir B-stigs dómara.



#### 4. gr. C-stigs dómarar

C-stigs dómari getur hver sá orðið, sem starfað hefur sem B-stigs dómari síðastliðin 2 ár og lokið námskeiði sem haldið er af dómaranefnd HSÍ. Námskeið fyrir C-stigs dómara skulu haldin að minnsta kosti einu sinni á ári.

Dómaranefnd HSÍ getur veitt undanþágu frá þessum skilyrðum, þegar sérstaklega stendur á.

Dómaraefni skal standast þríþætt próf, skriflegt, verklegt og líkamlegt og skulu þessi próf vera í samræmi við EHF/IHF próf á hverjum tíma.

C-stigs dómari hefur rétt til að dæma alla leiki.

Dómaranefnd HSÍ velur árlega deildardómara úr hópi C-stigs dómara og skulu þeir einir dæma leiki í meistaraflokki, 2. flokki karla, úrslitaleiki yngri flokka og í bikarkeppni yngri flokka.

Deildardómarar skulu gangast undir og standast skriflegt próf í dómarafræðum og sérstakt þolpróf dómaranefndar HSÍ að minnsta kosti tvívar á ári.

Miðað skal við að starfstíma deildardómara ljúki ekki síðar en í lok þess árs, sem hann verður 60 ára.

Deildardómurum skal skipt í eftirfarandi fjóra flokka:

#### Hópur 1

Dæma í efstu deildum karla og kvenna og alla úrslitaleiki, hvort sem er í deildar-, bikar- eða úrslitakeppni meistaraflokks.

#### Hópur 2

Dæma í efstu og næstefstu deildum karla og kvenna, næsta skref er að dæma úrslitaleiki í meistaraflokki.

#### Hópur 3

Dæma reglulega í næstefstu deildum karla og kvenna og 2. deild, næsta skref er að dæma reglulega í efstu deildum.

#### Hópur 4

Dæma í 2. deild og yngri flokkum, næsta skref er að dæma reglulega í næstefstu deildum.



Ofangreind skipting skal vera til viðmiðunar þegar dómurum er raðað niður á leiki. Dómaranefnd HSÍ getur veitt undanþágu frá ofangreindum ákvæðum um skiptingu deildardómara og starfssvið þeirra, þegar sérstaklega stendur á og hefur leyfi til að bregða út frá þessum flokkum í niðurröðun í einstökum tilfellum.

### **5. gr. Virkir dómarar**

Aðeins virkir dómarar skulu dæma leiki, er fram fara á vegum aðila innan HSÍ.

Virkir dómarar teljast þeir sem starfað hafa við að minnsta kosti 15 leiki á síðastliðnu ári eða við 20 leiki á síðastliðnum tveimur árum á vegum aðila innan HSÍ. Leikir í hraðmótum félaga og æfingarleikir eru metnir sérstaklega. Aðildarfélög HSÍ skulu halda skrá um leiki dómara innan þeirra félaga.

Óski dómari, sem ekki getur talist virkur samkvæmt fyrrgreindu ákvæði, eftir að öðlast dómararéttindi á ný, skal hann og/eða félag hans senda dómaranefnd HSÍ beiðni þar um. Nefndin tekur síðan ákvörðun um hvort og hvers konar réttindi veitast á ný og getur veitt undanþágu frá fyrrgreindum skilyrðum við útgáfu réttinda.

Virkir dómarar skulu hafa ókeypis aðgang að handknattleiksleikjum hvar sem er á landinu enda beri þeir skírteini útgefið af skrifstofu HSÍ, samkvæmt reglugerð HSÍ um aðgönguskírteini.

Stjórnarmenn HDSÍ, og eftirlitsmenn dómaranefndar sem og heiðursfélagar HDSÍ, sem hlotið hafa dómararéttindi, teljast virkir dómarar.

### **6. gr. Svipting dómararéttinda**

Framkvæmdastjóri HSÍ getur meinað dómara að starfa á leikjum á vegum HSÍ tímabundið, í allt að 4 vikur, ef dómarinn hefur brotið alvarlega af sér í starfi eða veldur ekki starfi sínu ítrekað. Ef gripið er til þessa úrræðis, skal framkvæmdastjóri HSÍ senda dómaranefnd HSÍ erindi um málið innan sólarhrings frá ákvörðun og skal dómaranefnd taka málið fyrir á næsta fundi sínum eða eins fljótt og auðið er. Nefndin skal þar taka málið til skoðunar og ákveða um framhald þess. Nefndin getur fellt niður ákvörðun framkvæmdastjóra HSÍ eða ákveðið málsmeyferð skv. 2. mgr.

Verði dómara á alvarleg mistök í starfi eða hann gerist sekur um ámælisverða framkomu eða mál fer skv. 1. mgr. skal dómaranefnd HSÍ senda stjórn HSÍ skriflega greinargerð um málið sem tekur málið þegar í stað til meðferðar og ákveður viðurlög. Stjórn HSÍ getur svipt dómara réttindum að nokkru eða öllu leyti eða vísað máli til aganefndar í samræmi við ákvæði VI. kafla reglugerðar HSÍ um agamál.

### **7. gr. Félagaskipti dómara**



Dómara er heimilt að skipta um félag frá 1. júní – 1. september ár hvert og ber dómara að dæma fyrir það félag, sem hann er skráður í og er honum ekki heimilt að dæma hjá því félagi í meistaraflokki. Þó er dómara, sem skiptir um félag, ekki heimilt að dæma hjá því félagi, sem hann gengur úr næsta keppnistímabil þar á eftir hafi viðkomandi dómarí eða einstaklingur leikið með eða gegnt trúnaðarstörfum hjá því félagi.

Milliríkjadómarar, EHF/IHF, eru undanþegnir félagaskyldu og geta dæmt hjá hvaða félagi sem er.

## **II. Kafli Eftirlitsmenn**

### **8. gr. Eftirlitsmenn**

Dómaranefnd HSÍ tilnefnir eftirlitsmenn á leiki í meistaraflokkum karla og kvenna þegar ástæða er talin til, svo og á aðra þá leiki sem dómaranefnd kann að ákveða.

Hlutverk eftirlitsmanna er að fylgjast með og gefa skýrslu um frammistöðu dómara og aðstoðarmanna þeirra, það er tímavarða og ritara. Skýrslur eftirlitsmanna skulu gerðar á sérstöku eyðublaði, sem dómaranefnd útbýr og leggur til, og skal útfylling og frágangur vera skv. leiðbeiningum nefndarinnar. Eftirlitsmenn skulu senda skýrslur sínar með tölvupósti til skrifstofu HSÍ innan sólarhrings frá því að leik lýkur.

Eftirlitsmenn skulu einnig fylgjast með framkvæmd leiks samanber 18. G r. í reglugerð um handknattleiksmót.

## **III. Kafli Skyldur félaga**

### **9. gr. Tilnefning dómara**

Með þáttökutilkynningu félags skal hvert félag tilgreina two starfandi C-stigs dómara fyrir næsta keppnistímabil, fyrir hvert lið, sem tilkynnt er þátttaka fyrir í meistaraflokki. Einnig skal koma fram nafn þess sem hefur umsjón með málefnum dómara hjá féluginu.

Fyrir hvern meistarafloksleik sem félag leikur án þess að uppfylla ofangreind skilyrði er HSÍ heimilt að sekta viðkomandi félag um kr. 5.000 til HSÍ fyrir hvern dómara sem ekki hafa verið tilgreindir réttilega til HSÍ.

### **10. gr. Ritarar og tímaverðir**

Dómaranefnd HSÍ heldur árlega námskeið fyrir ritara- og tímaverði.

Félög sem taka þátt í efstu deild mfl. karla og kvenna er skylt að hafa lágmark 4 starfsmenn, sem hafa tekið námskeið í ritara- og tímavörslu. Þessir starfsmenn ásamt



virkum B og C-stigs dómurum eru þeir einu sem geta starfað sem ritarar- og tímaverðir í efstu deild meistaraflokks karla og kvenna. Félag skal tilnefna aðila til að sjá um að þessir starfsmenn þekki vel til verka og sé kynnt reglulega leiðbeiningar um störf þeirra.

## **11. gr. Þjálfarafundur**

Félög sem taka þátt í meistaraflokki karla og kvenna er skylt að senda þjálfara á fund, sem dómaranefnd boðar til í upphafi hvers keppnistímabils, til að fara yfir leikreglur og áherslur dómaranefndar.

Mæti ekki þjálfari félags á ofangreindan fund er stjórn HSÍ heimilt að sekta viðkomandi félag um allt að kr. 50.000,- hafi viðkomandi ekki lögmæta ástæðu fyrir fjarveru sinni.

## **IV. Kafli Önnur ákvæði**

### **12. gr. Mæting dómara**

Dómarar og eftirlitsmenn skulu vera mættir á leikstað, á þá leiki sem dómaranefnd HSÍ raðar á, 60 mínútum áður en leikur á að hefjast. Viðkomandi heimalið skal hafa samband við dómaranefnd/starfsmann HSÍ ef dómarar eru ekki mættir 40 mínútum áður en leikur á að hefjast.

### **13. gr. Forföll dómara**

Forfallist dómari, fyrir eða í leik, er dómaranefnd, starfsmaður dómaranefndar eða framkvæmdastjóra HSÍ heimilt að kalla til annan virkan dómara í stað þess sem forfallast. Í undanúrslitum og úrslitaleikjum Íslandsmóts meistaraflokka og í undan- og úrslitaleikjum bikarkeppni meistaraflokka skal dómaranefnd hafa varadómara til staðar á keppnisstað sé þess nokkur kostur.

### **14. gr. Fjarskiptabúnaður**

Dómurum ber skylda að nota fjarskiptabúnað (talstöðvar) í efstu deildum karla og kvenna í meistaraflokki, í bikarkeppni frá og með 16-liða úrslitum í meistaraflokki, í umspili um sæti í efstu deild í meistaraflokki, í úrslitakeppnum meistaraflokks og öllum úrslitaleikjum yngri flokka.

Eftirlitsmanni er heimilt að vera tengdur inná fjarskiptabúnað dómara í öllum leikjum.



## 15. gr. Gjöld og kostnaður

Aðildarfélög HSÍ bera allan kostnað vegna dómgæslu leikja sinna en HSÍ sér um innheimtu þess kostnaðar og greiðir til dómara. HSÍ áætlar fyrir hvert keppnistímabil dómarakostnað hvers félags og gefur út greiðslu- og gjalddagaáætlun til félaga fyrir 15. júní ár hvert. Gjöldin eru innheimt í nokkrum gjalddögum, ekki færri en fjórum, þar sem fyrstu gjalddagar byggja á áætlun en síðasta greiðsla félags er uppgjörsgreiðsla.

Falli einn eða fleiri gjalddagar í vanskil skv. útgefinni greiðsluáætlun og greiðslukröfu frá HSÍ og sinnir félag ekki áskorun um greiðslu ógreiddra gjaldfallinna gjalda innan 15 daga frá dagsetningu áskorunar, skal stjórn HSÍ draga 2 stig af því meistaraflokkliði félags sem best stendur í deildarkeppni HSÍ með sérstakri stjórnarákvörðun.

Gjaldskrá dómara ákvarðast árlega af stjórn HDSÍ fyrir nk. keppnistímabil. Gjaldskrá HDSÍ örðlast ekki gildi fyrr en með samþykki stjórnar HSÍ. Stjórn HSÍ er heimilt að óska eftir frekari rökstuðningi eða fara fram á breytingar á tillögum HDSÍ ef þurfa þykir.

Mæti dómrarar ekki til leiks í deildar- og bikarleiki, án gildra ástæðna, þannig að leikur fellur niður, skal HSÍ standa straum af þeim kostnaði sem félögin verða sannanlega fyrir.

## 16. gr. Kærur

Ekki er hægt að kæra eða mótmæla úrskurði dómara á leikvelli, sem byggður er á mati hans á stöðunni í hverju tilviki.

## 17. gr. Myndbönd og myndbandssannanir

Dómarar leikja geta í undantekningartilfellum nýtt sér myndbandsupptökur til lokaákvörðunar um dóma í leikjum sem eru í beinni sjónvarpsútsendingu sé slíkt í boði. Þrátt fyrir þessa heimild skulu dómrarar í einu og öllu fara eftir leikreglum IHF í sínum ákvörðunum og er ekki um að ræða breytingu á þeim reglum og viðmiðunum sem nú gilda.

Dómaranefnd skal setja nánari reglur um notkun myndbandsupptakna við ákvörðunartöku.

## V. Kafli GILDISTAKA

## 18. gr. Gildistaka

Reglugerð þessi er sett með stoð í 18. grein laga HSÍ og örðlast þegar gildi. Við gildistöku hennar fellur úr gildi eldri reglugerð HSÍ um dómara og eftirlitsmenn.

*Samþykkt af stjórn HSÍ 10. júní 2020.*